

CINNEADH CUR CHUN FEIDHME (AE) 2023/694 ÓN gCOIMISIÚN
an 22 Márta 2023

maidir leis an iarraidh ar chlárú an tionscnaimh Eorpaigh ó na saoránaigh dar teideal *End The Horse Slaughter Age* [Cuirtear Deireadh le Ré Mharaithe na gCapall] de bhun Rialachán (AE) 2019/788 ó Pharlaimint na hEorpa agus ón gComhairle

(a bhfuil fógra tugtha ina leith faoi C(2023) 1839)

(Is é an téacs Béarla amháin atá barántúil)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2019/788 ó Pharlaimint na hEorpa agus ón gComhairle an 17 Aibreán 2019 maidir leis an tionscnamh Eorpach ó na saoránaigh ⁽¹⁾, agus go háirithe Airteagal 6(2) agus (3) de,

De bharr an mhéid seo a leanas:

- (1) An tionscnamh Eorpach ó na saoránaigh dar teideal *End The Horse Slaughter Age* [Cuirtear Deireadh le Ré Mharaithe na gCapall], cuireadh iarraidh ar a chlárú faoi bhráid an Choimisiúin an 31 Eanáir 2023.
- (2) Is iad seo a leanas cuspóirí an tionscnaimh mar a chuir na heagraithe in iúl iad: “Leis an tionscnamh Eorpach ó na saoránaigh *End The Horse Slaughter Age* [Cuirtear Deireadh le Ré Mharaithe na gCapall] táthar ag iarraidh go mbeadh dlí ann chun toirmeasc a chur ar mharú capall, lena n-áirítear sa toirmeasc póru capall agus onnmhairiú capall chun fionnadh, leathar nó feoil a tháirgeadh nó chun cógais nó substaintí eile a mhonarú. Leis an tionscnamh Eorpach ó na saoránaigh *End The Horse Slaughter Age* [Cuirtear Deireadh le Ré Mharaithe na gCapall] táthar ag iarraidh go mbeadh dlí ann freisin chun stop a chur le hiompar fadachair capall ar fud na hEorpa le haghaidh maraithe agus go mbeadh rialachán ann chun capaill a chosaint ar iallach a bheith curtha orthu obair iomarcach a dhéanamh nó dul faoi oiliúint chrua.”
- (3) In Iarscríbhinn a ghabhann leis an tionscnamh, tugtar tuilleadh sonraí ar an ábhar, ar na cuspóirí agus ar an gcúlra. Maíonn na heagraithe gur cleachtas cruálach é capaill a mharú lena gcaitheamh ag an duine, cleachtas atá spreagtha ag an éileamh ar fheoil chapaill, nach bhfuil sábháilte lena gcaitheamh ag an duine. Leis an toirmeasc ar chapaill a mharú, ba mhaith leis na heagraithe an reachtaíocht ar chapaill a thabhairt i gcomhréir leis an reachtaíocht maidir le madraí agus cait.
- (4) Mar chuid dá n-iarraidh ar chlárú, chuir an grúpa eagraithe doiciméad breise isteach ina bhfuil roinnt sonraí breise maidir le cuspóirí an tionscnaimh ó na saoránaigh atá beartaithe agus dréacht-ghníomh dlí ina léirítear príomhchuspóirí an tionscnaimh.
- (5) Measann an Coimisiún nach leir go dtagann aon chuid den tionscnamh lasmuigh de chreat chumhachtaí an Choimisiúin chun togra le haghaidh gníomh dlí de chuid an Aontais a thíolacadh chun na Conarthaí a chur chun feidhme. Le hAirteagal 43(2) den Chonradh, tugtar de chumhacht don Choimisiún *inter alia* reachtaíocht a mholadh lena leagtar síos íoschaighdeáin chun ainmhithe a choinnítear chun críocha feirmeoireachta a chosaint. Le hAirteagail 114 agus 207 den Chonradh, tugtar de chumhacht don Choimisiún reachtaíocht a mholadh lena chuirtear cosc ar chapaill a chur ar an margadh agus a onnmhairiú chun fionnadh, leathar nó feoil a tháirgeadh nó chun cógais leighis nó substaintí eile a mhonarú.
- (6) Is conclúid é sin atá gan dochar don mheasúnú ar cé acu a chomhlíonfaí nó nach gcomhlíonfaí, sa chás seo, na coinníollacha coimreiteacha substainteacha is gá le go ngníomhódh an Coimisiún, coinníollacha lena n-áirítear comhlíonadh phrionsabail na comhréireachta agus na coimhdeachta, sin agus comhoiriúnacht le cearta bunúsacha.
- (7) Tá fianaise iomchuí curtha ar fáil ag an ngrúpa eagraithe go gcomhlíonann sé na ceanglais a leagtar síos in Airteagal 5(1) agus (2) de Rialachán (AE) 2019/788 agus gur i gcomhréir le hAirteagal 5(3), an chéad fhomhír, den Rialachán sin atá na teagmhálaithe ainmnithe aige.

⁽¹⁾ IO L 130, 17.5.2019, lch. 55.

- (8) Ní tionscnamh é ar follas é a bheith míchuí, suaibhreasach ná cráiteach, ná ní follas go bhfuil sé contrártha do luachanna an Aontais a leagtar amach in Airteagal 2 den Chonradh ar an Aontas Eorpach ná do na cearta a chumhdaítear i gCairt um Chearta Bunúsacha an Aontais Eorpaigh.
- (9) Dá bhrí sin, ba cheart an tionscnamh dar teideal *End The Horse Slaughter Age* [Cuirtear Deireadh le Ré Mharaithe na gCapall] a chlárú.
- (10) An chonclúid go gcomhlíontar na coinníollacha maidir le clárú faoi Airteagal 6(3) de Rialachán (AE) 2019/788, ní rud í a thugann le tuiscint go ndearbhaíonn an Coimisiún ar bhealach ar bith go bhfuil ábhar an tionscnaimh cruinn fíorasach, agus is é grúpa eagraithe an tionscnaimh amháin atá freagrach as an méid sin. Ní chuireann ábhar an tionscnaimh ach tuairimí an ghrúpa eagraithe in iúl, agus ní féidir a dhéanamh amach ar aon bhealach gurb iad tuairimí an Choimisiúin a léiríonn sé.

TAR ÉIS AN CINNEADH SEO A GHLACADH:

Airteagal 1

Clárófar an tionscnamh Eorpach ó na saoránaigh dar teideal *End The Horse Slaughter Age* [Cuirtear Deireadh le Ré Mharaithe na gCapall].

Airteagal 2

Tá an Cinneadh seo dírithe chuig grúpa eagraithe an tionscnaimh ó na saoránaigh dar teideal *End The Horse Slaughter Age* [Cuirtear Deireadh le Ré Mharaithe na gCapall], grúpa a bhfuil Paola SGARBAZZINI agus Nora PAGLIONICO mar ionadaithe aige, agus iad ag gníomhú mar theagmhálaithe thar a cheann.

Arna dhéanamh sa Bhruiséil, an 22 Márta 2023.

Thar ceann an Choimisiúin
Věra JOUROVÁ
Leas-Uachtarán
